

第二七六册

明倫彙編

官常典

公輔部

(卷)

三亮一覽

古今圖書集成

中華書局影印

古今圖書集成

欽定古今圖書集成明倫彙編官常典

第二百三十九卷目錄

公輔部名臣列傳五十九

元一

耶律楚材

粘合重山 子南令

康希憲

張文謙

耶律鑄

劉秉忠

官常典第二百三十九卷

公輔部名臣列傳五十九

元一

耶律楚材

按元史本傳楚材字晉卿遼東丹王突欲八世孫父履以學行事金世宗特見親終尚書右丞楚材生三歲而孤母楊氏教之學及長博極羣書旁通天文地理律曆術數及釋老醫卜之說下筆爲文若宿構者金制宰相子例試補省掾楚材欲試進士科章宗詔如舊制問以疑獄數事時同試者十七人楚材所對獨優遂辟爲掾後仕爲開州同知貞祐二年宣宗遷汴完顏復興行中書事留守燕辟爲左右司員外郎太祖定燕聞其名召見之楚材身長八尺美髯宏聲帝偉之曰遼金世讎朕爲汝雪之對曰臣父祖嘗委質事之旣爲之臣敢讎君耶帝重其言處之左右遂呼楚材曰吾圖撒合里而不名吾圖撒合里蓋國語長髯人也己卯夏六月帝西討回國國旗之日雨雪三尺帝疑之楚材曰元冥之氣見於盛夏克敵

之徵也庚辰冬大雷復問之對曰回國主當死於野後皆驗夏人常八斤以善造弓見知於帝因每自矜曰國家方用武耶律儒者何用楚材曰治弓尚須用弓匠爲天下者豈可不用治天下匠耶帝聞之甚喜曰見親用西域曆人奏五月望夜月當蝕楚材曰否卒不蝕明年十月楚材言月當蝕西域人曰不蝕至期果蝕八分壬午八月長星見西方楚材曰女直將易主矣明年金宣宗果死帝每征討必命楚材卜帝亦自灼羊脾以相符應指楚材謂太宗曰此人天賜我家爾後軍國庶政當悉委之甲申帝至東印度駐鐵門關有一角獸形如鹿而馬尾其色綠作人言謂侍衛者曰汝主宜早還帝以問楚材對曰此瑞獸也其名角端能言四方語好生惡殺此天降符以告陛下陛下天下之元子天下之人皆陛下之子願承天心以全民命帝即日班師丙戌冬從下靈武諸將爭取子女金帛楚材獨收遺書及大黃藥材既而士卒病疫得大黃輒愈帝自經營西土未暇定制州郡長吏生殺任情至奪人妻女取貨財兼土田燕薊畱後長官石抹威得卜尤貪暴殺人盈市楚材聞之泣下即入奏請禁州郡非奉聖書不得擅徵發囚當大辟者必待報違者罪死於是貪暴之風稍戢燕多劇賊未夕輒曳牛車指富家取其財物不與則殺之時睿宗以皇子監國事聞遣中使偕楚材往窮治之楚材詢察得其姓名皆畱後親屬及勢家子盡捕下獄其家路中使將緩之楚材示以禍福中使懼從其言獄具數十人於市燕民始安己丑秋太宗將即位宗親咸會議猶未決時睿宗爲太宗親弟故楚材言於

睿宗曰此宗社大計宜早定睿宗曰事猶未集別擇日可乎楚材曰過是無吉日矣遂定冊立儀制乃告親王察合台曰王雖兄位則臣也禮當拜王拜則莫敢不拜王深然之及即位王率皇族及臣僚拜帳下既退王撫楚材曰真社稷臣也國朝尊屬有拜禮自此始時朝集後期應死者衆楚材奏曰陛下新即位宜宥之太宗從之中原甫定民多諷禁網而國法無赦令楚材議請肆宥衆以云迂楚材獨從容爲帝言詔自庚寅正月朔日前事勿治且條便宜一十八事頒天下其略言郡宜置長吏牧民設萬戶總軍使勢均力敵以遏驕橫中原之地財用所出宜存恤其民州縣非奉上命敢擅行科差者罪之貿易借貸官物者罪之蒙古回鶻河西諸人種地不納稅者死監主自盜官物者死應犯死罪者具由申奏待報然後行刑貢獻禮物爲害非輕深宜禁斷帝悉從之唯貢獻一事不允曰彼自願饋獻者宜聽之楚材曰蠶害之端必由于此帝曰凡卿所奏無不從者卿不能從朕一事耶太祖之世歲有事西域未暇經理中原官吏多聚斂自私資至鉅萬而官無儲待近臣別迭等言漢人無補於國可悉空其人以爲牧地楚材曰陛下將南伐軍需宜有所資誠均定中原地稅商稅鹽酒鐵冶山澤之利歲可得銀五十萬兩兩八萬匹粟四十餘萬石足以供給何謂無補哉帝曰卿試爲朕行之乃奏立燕京等十路徵收課稅使凡長貳悉用士人如陳時可趙昉等皆寬厚長者極天下之選參佐皆用省部舊人辛卯秋帝至雲中十路咸進康籍及金帛陳于廷中帝笑謂楚材曰汝不去朕左右而

能使國用充足南國之臣復有如卿者乎對曰在彼者皆賢於臣臣不才故爾燕爲陛下用帝嘉其謙賜之酒即日拜中書令事無鉅細皆先白之楚材奏凡州郡宜令長吏專理民事萬戶總軍政凡所掌課稅權貴不得侵之又舉鎮海粘合均與之同事權貴不能平咸得卜以舊怨尤疾之詣於宗王曰耶律中書令率用親舊必有二心宜奏殺之宗王遣使以聞帝察其誣責使者罷遣之屬有訟咸得卜不法者帝命楚材鞠之奏曰此人倨傲故易招謗今將有事南方他日治之未晚也帝私謂侍臣曰楚材不較私讎真寬厚長者汝曹當效之中貴可思不花奏採金銀役夫及種田西域與裁蒲萄戶帝令於西京宣德從萬餘戶充之楚材曰先帝遺詔山後民質朴無異國人緩急可用不宜輕動今將征河南請無殘民以給此役帝可其奏壬辰春帝南征將涉河詔逃難之民來降者免死或曰此輩急則降緩則走徒以資敵不可宥楚材請製旗數百以給降民使歸田里全活甚衆舊制凡攻城邑敵以矢石相加者卽爲拒命既克必殺之汴梁將下大將速不台遣使來言金人抗拒持久師多死傷城下之日宜屠之楚材馳入奏曰將士暴露數十年所欲者土地人民耳得地無民將焉用之帝猶豫未決楚材曰奇巧之工厚藏之家皆萃於此若盡殺之將無所獲帝然之詔罪止完顏氏餘皆勿問時避兵居汴者得百四十七萬人楚材又請遣人入城求孔子後得五十一代孫元措奏襲封衍聖公付以林廟地命收太常禮樂生及召名儒梁陟王萬慶趙著等使直釋九經進講東宮又率大臣子孫

執經解義俾知聖人之道置編修所於燕京經籍所於平陽由是文治興焉時河南初破俘獲甚衆軍還逃者十七八有冒居停逃民及資給者減其家鄉社亦連坐由是逃者莫敢舍多殍死道路楚材從容進曰河南既平民皆陛下赤子走復何之奈何因一俘囚連死數十百人乎帝悟命除其禁金之亡也唯秦鞏二十餘州久未下楚材奏曰往年吾民逃罪或萃於此故以死拒戰若許以不殺將不攻自下矣詔下諸城皆降甲午議籍中原民大臣忽都虎等議以丁爲戶楚材曰不可丁逃則賦無所出當以戶定之爭之再三卒以戶定時將相大臣有所驅獲往往寄畱諸郡楚材因括戶口並令爲民匿占者死乙未朝議將四征不庭若遣同回人征江南漢人征西域深得制御之術楚材曰不可中原西域相去遼遠未至敵境人馬疲乏兼水土異宜疾疫將生宜各從其便從之丙申春諸王大集帝親執觴賜楚材曰朕之所以推誠任卿者先帝之命也非卿則中原無今日朕所以得安枕者卿之力也西域諸國及宋高麗使者來朝語多不實帝指楚材示之曰汝國有如此人乎皆謝曰無有殆神人也帝曰汝等唯此言不妄朕亦度必無此人有子元者奏行交鈔楚材曰金章宗時初行交鈔與錢通行有司以出鈔爲利收鈔爲諱謂之老鈔至以萬貫難易一餅民力困竭國用匱乏當爲鑒戒今印造交鈔宜不過萬錠從之秋七月忽都虎以民籍至帝議裂州縣賜親王功臣楚材曰裂土分民易生嫌隙不如多以金帛與之帝曰已許奈何楚材曰若朝廷置吏收其貢賦歲終頒之使毋擅科徵

可也帝然其計遂定天下賦稅每二戶出絲一斤以給國用五戶出絲一斤以給諸王功臣湯沐之資地稅中田每畝二升又半上田三升下田二升水田每畝五升商稅十分而一鹽價銀一兩四十斤既定常賦朝議以爲太輕楚材曰作法於涼其弊猶食後將有以利進者則今已重矣時工匠製造糜費官物十私八九楚材請皆考覈之以爲定制時侍臣脫歡奏簡天下室女詔下楚材尼之不行帝怒楚材進曰向擇美女二十有八人足備使令今復選技臣恐擾民欲覆奏耳帝良久曰可罷之又欲收民牝馬楚材曰田獵之地非馬所產今若行之後必爲人害又從臣儒臣之事業非積數十年始未易成也帝曰果爾可官其人楚材曰請校試之乃命宣德州宣課使劉中隨郡考試以經義詞賦論分爲三科儒人被俘爲奴者亦令就試其主匿弗遣者死得士凡四千三十人免爲奴者四之一先是州郡長吏多借買人銀以償官息累數倍曰羊羔兒利至奴其妻子猶不足償楚材奏令本利相伴而止未爲定制民間所負者官爲代償之至一衡量給符印立鈔法定均輸布遞傳明驛參庶政略備民稍蘇息焉有二道士爭長互立黨與其一誣其讎之黨二人爲逃軍結中貴及通事楊惟忠執而虐殺之楚材接收惟忠中貴復訴楚材違制帝怒繫楚材既而自悔命釋之楚材不肯解縛進曰臣備位公輔國政所屬陛下初令繫臣以有罪也當明示百官罪在不赦今釋臣是無罪也豈宜輕易反覆如戲小兒國有大事何以行焉衆皆失色帝

曰朕雖爲帝寧無過舉耶乃溫言以慰之楚材因陳時務十策曰信賞罰正名分給俸祿官功臣考殿最均科差選工匠務農桑定土貢制漕運皆切於時務悉施行之太原路轉運使呂振副使劉子振以賊抵罪帝責楚材曰卿言孔子之教可行儒者爲好人何故乃有此輩對曰君父教臣子亦不欲令陷不義三綱五常聖人之名教有國家者莫不由之如天之有日月也豈得緣一夫之失使萬世常行之道獨見廢於我朝乎帝意乃解富人劉忽駕馬涉獵發丁劉廷玉等以銀一百四十萬兩撲買天下課稅楚材曰此貪利之徒罔上虐下爲害甚大奏罷之常曰典一利不如除一害生一事不如省一事任尚以班超之言爲平平耳千古之下自有定論後之負譴者方知吾言之不妄也帝素嗜酒日與大臣酣飲楚材屢諫不聽乃持酒槽鐵口進曰勸莫能腐物鐵尚如此况五臟乎帝悟語近臣曰汝曹愛君憂國之心豈有如吾圖撒合里者耶賞以金帛救近臣日進酒三鍾而止自庚寅定課稅格至甲午平河南歲有增羨至戊戌課銀增至一百一十萬兩譯史安天合者諂事鎮海首引與都刺合蠻撲買課稅又增至二百二十萬兩楚材極力辨諫至聲色俱厲言與涕俱帝曰爾欲搏鬪耶又曰爾欲爲百姓哭耶姑令試行之楚材力不能止乃歎息曰民之困窮將自此始矣楚材嘗與諸王宴醉臥車中帝臨平野見之直幸其營登車手撼之楚材熟睡未醒方怒其擾已忽開目視始知帝至驚起謝帝曰有酒獨醉不與朕同樂耶笑而去楚材不及冠帶馳詣行宮帝爲置酒極歡而罷楚材當國

日久得祿分其親族未嘗私以官行省劉敏從容言之楚材曰睦親之義但當資以金帛若使從政而違法吾不能徇私恩也歲辛丑二月三日帝疾篤醫言脈已絕皇后不知所爲召楚材問之對曰今任使匪人賣官鬻獄囚繫非辜者多古人一言而善惡懸退舍請救天下囚徒後即欲行之楚材曰非君命不可俄頃帝少蘇因入奏請肆赦帝已不能言首肯之是夜醫者候脈復生適宜讀救書時也翌日而癘冬十一月四日帝將出獵楚材以太乙數推之亟言其不可左右皆曰不騎射無以爲樂獵五日帝崩於行在所皇后乃馬眞氏稱制崇信姦回庶政多紊奧魯刺合蠻以貨得政柄廷中悉畏附之楚材面折廷爭言人所難言人皆危之癸卯五月焚悉犯房楚材奏曰當有驚擾然訖無事居無何朝廷用兵事起倉卒后遂令授甲選腹心至欲西還以避之楚材進曰朝廷天下根本根本一搖天下將亂臣觀天道必無患也後數日乃定后以御寶空紙付奧都刺合蠻使自書與行之楚材曰天下者先帝之天下朝廷自有憲章今欲素之臣不敢奉詔事遂止又有旨凡奧都刺合蠻所建白令史不爲書者斷其手楚材曰國之典故先帝悉委老臣令史何與焉事若合理自當奉行如不可行死且不避况截手乎后不悅楚材辨論不已因大聲曰老臣事太祖太宗三十餘年無負於國皇后亦豈能無罪殺臣也后雖憾之亦以先朝舊勳深敬憚焉甲辰夏五月薨於位年五十五皇后哀悼賻贈甚厚後有譖楚材者言其在相位日久天下貢賦半入其家后命近臣麻里孔覆視之唯琴玩十餘及

古今書畫金石遺文數千卷至順元年贈經國議制寅亮佐運功臣太師上柱國追封廣寧王諡文正子鉉鑄

拈合重山 子南合

按元史本傳重山金源貴族也國初爲質子知金將亡遂委質焉太祖賜畜馬四百匹使爲宿衛官必闕赤從平諸國有功國涼州執大旗指麾六軍手中流矢不動已而爲侍從官數得侍宴內廷因諫曰臣聞天子以天下爲憂憂之未有不治忘憂未有能治者也置酒爲樂此忘憂之術也帝深嘉納之立中書省以重山有積勳授左丞相時耶律楚材爲右丞相凡建官立法任賢使能與夫分郡邑定課賦通漕運足國用多出楚材而重山佐成之太宗七年從伐宋詔軍前行中書省事許以便宜師入宋境江淮州邑望風款附重山降其民三十餘萬取定城天長二邑不誅一人復入中書視事賜中廐馬十匹貫珠袍一卒贈太尉封魏國公諡忠武十年詔其子江淮安撫使南合嗣行軍前中書省事時大將察罕圍壽春七日始下欲屠其城南合曰不降者獨守將耳其民何罪由是獲免初世祖伐宋軍於汴南合進曰李璵承國厚恩坐制一方然其人多詐叛無日矣帝亦患之中統元年兩遷宣撫使明年授中書右丞中興等路行中書省事三年遷秦蜀五路四川行中書省事其年李璵反益都帝使諭南合曰卿言猶在耳璵果反矣卿宜謹守西鄙對曰臣謹受詔不敢以西鄙爲陛下憂明年授中書平章政事四年病卒封魏國公諡宣昭

廉希憲

按元史本傳希憲字善甫布魯海牙子也幼魁偉舉止異凡兒九歲家奴四人盜五馬逃去既獲時於法當死父怒將付有司希憲泣諫止之俱得免死又嘗侍母居中山有二奴醉出惡言希憲曰是以我為幼也即送繫府獄杖之皆奇其有識世祖為皇弟希憲年十九得入侍見其容止議論恩寵殊絕希憲為好經史手不釋卷一日方讀孟子聞名急懷以進世祖問其說遂以性善義利仁暴之旨為對世祖嘉之目曰廉孟子由是知名嘗與近臣校射世祖前希憲腰插三矢有欲取以射者希憲曰汝以我為不能耶但吾弓力稍弱耳左右授以勁弓三發連中衆驚服曰真文武材也歲甲寅世祖以京兆分地命希憲為宣撫使京兆控制隴蜀諸王貴藩分布左右民雖羌戎尤號難治希憲講求民病抑強扶弱暇日從名儒若許衡姚樞輩諮訪治道首請用衡提舉京兆學校教育人材為根本計國制為士者無隸奴籍京兆多豪強廢令不行希憲至悉令者籍為儒有民妻與卜者厭詛其夫殺之獄成僚佐皆言方大旱卜者宜減死希憲議當伏法已而大雨立應初世祖受命憲宗經理河南關右居數歲議者謂王府人多事擅不法至是命阿藍答兒劉太平檢察所部用酷吏分領其事大開告許希憲曰宣撫司事由已出有罪固當獨任僚屬何預及事竟卒無獲罪者已未憲宗駐蹕合州世祖渡江取鄂州命希憲入籍府庫希憲引儒生百餘拜伏軍門因言今王師渡江凡軍中俘獲士人宜官購遣還以廣異恩世祖嘉納之還者五百餘人憲

宗崩訃音至希憲啓曰殿下太祖嫡孫先皇母弟前征雲南寇期撫定及今南伐率先渡江天道可知且殿下收召才傑悉從人望子惠黎庶率土歸心今先皇奄棄萬國神器無主願速還京正大位以安天下世祖然之且命希憲先行審察事變對曰劉太平霍魯海在關右渾都海在六盤征南諸軍散處秦蜀太平要結諸將其性險詐素畏殿下英武倘倚關中形勝設有異謀漸不可制宜遣趙良弼往覘人情事宜從之阿里不哥搆亂北邊遣脫忽思發兵河朔大肆凶暴真定名士李榮嘗率莊聖太后命侍阿里不哥講讀脫忽思怒榮不附己械之希憲訪榮於獄言於世祖而釋之世祖命希憲賜膳於宗王塔察兒希憲即以己意白王宜首建翊戴之謀王然之許以身任其事歸啓其言世祖曰若此重事卿何懼之甚耶庚申至開平宗室諸王勸進謙讓未允希憲復以天時人事進言且曰阿里不哥於殿下為母弟居守朔方專制有年或覬望神器事不可測宜早定大計世祖然之明日即位建元中統希憲上言高麗王子僞久留京師今聞其父死宜立為王遣還國以恩結之又言鄂兵未還宜遣使與宋講好敕諸軍北歸帝皆從之趙良弼還自關右奏劉太平霍魯海反狀皆如希憲言初分漢地為十道乃併京兆四川為一道以希憲為宣撫使太平霍魯海聞之乘驛急入京兆密謀為變後三日希憲至宣布詔旨遣使安諭六盤未幾斷事官闊闕出遣使來告渾都海已反殺所遣使者朶羅台遣人諭其黨密里火者於成都乞台不花於青居使各以兵來援又多與蒙古軍奧魯官兀奴

忽等金帛盡起新軍且約太平霍魯海同日俱發希憲得報名僚屬謂曰上新即位責任吾等正為今日不早為之計殆將無及遣萬戶劉黑馬京兆治中高鵬霄華州尹史廣掩捕太平霍魯海及其黨獲之盡得其奸謀悉置於獄復遣劉黑馬密里火者總帥汪惟正誅乞台不花具以驛聞時關中無兵備命汪惟良將秦鞏諸軍進六盤惟良以未得上旨為辭希憲即解所佩虎符銀印授之曰此皆身承密旨君但辦吾事制符已飛奏矣又付銀一萬五千兩以充功賞出庫幣製軍衣惟良感激遂行又發蜀卒更戍及在家餘丁推節制諸軍蒙古官八春將之謂之曰君所將之衆未經訓練六盤兵精勿與爭鋒但張聲勢使不得東則大事濟矣會有詔赦至希憲命較太平等於獄尸於通衢方出迎詔人心遂安乃遣使自劾停赦行刑徵調諸軍擅以惟良為帥等罪帝深善之曰經所謂行權此其是也別賜金虎符使節制諸軍且詔曰朕委卿以方面之權事當從宜毋拘常制坐失事機西川將紐鄰奧魯官將舉兵應渾都海八春獲之繫其黨五十餘人於乾州獄送二人至京兆請并殺之二人自分必死希憲謂僚佐曰渾都海不能乘勢東來保無他慮今衆志未一猶懷反側彼軍見其將校執囚或別生心為害不細今因其懼死並加寬釋使之感恩効力就發此軍餘丁往隸八春上策也初八春既執諸校其軍疑懼駭亂四出莫可禁遏及知諸校獲全紐鄰奧魯官得釋大喜過望切諭其屬出兵効力人人感悅八春亦釋然開悟果得精騎數千將與俱西詔以希憲為中書右丞行秦蜀省事

渾都海聞京兆有備遂西渡河趨甘州阿藍答兒復自和林提兵與之合分結隴蜀諸將又使紐鄰兄宿敦爲書招紐鄰於是成都帥百家奴與元忙古台青居汪惟正欽察俱遣使言人心危疑事不可測希憲遣使深諭戒之兩川諸將素憚希憲威名按堵從命渾都海阿藍答兒合軍而東諸將失利河右大寨西土親王執畢帖木兒輜重皆空就食秦雍朝議欲棄兩川退守興元希憲力言不可乃止會親王合丹及汪惟良八春等合兵復戰西涼大敗之俘斬略盡得二叛首以送梟之京兆市事聞帝大嘉之曰希憲眞男子也進拜平章政事賜宅一區時希憲年三十矣希憲奏四川降民皆散處山谷宜申收軍吏禁止俘掠違者千戶以下與犯人同罪又禁諸人無販易生口由是四川遂安降者益衆又罷解鹽戶所摘軍及京兆諸處無籍戶之戍靈州屯田者以寬民力欽察獲宋臣張炳震王政二人俱以母老願賜矜放希憲皆遣之還因爲書與宋四川制置余玠論以天道人事玠得書愧感自守不敢復輕動玠帥府言鎮戎州有謀爲叛者連引四百餘人希憲詳推之惟誅首惡五人宋將劉整以瀘州降盡繫前歸宋者數百人待報希憲奏釋之且致書宰臣待整以恩當得其死力整後首建取襄陽之策果立勳効宋將家屬之在北者希憲歲給其糧仕於宋者子弟得越界省其親人皆感之李璫反山東事連王文統平章趙璧素忌希憲勳名因言文統爲張易希憲薦引遂至大用且關中形勝之地希憲得民心有商挺趙良弼爲之輔此事宜關聖慮帝曰希憲自幼事朕朕知其心挺良

弼皆正士何慮焉蜀伶人費正寅以私怨譖希憲因李璫叛亦修城治兵潛畜異志帝因惑之命中書右丞南合代希憲行省且覆視所告事卒無實狀詔希憲還京師陛見言曰方關陝叛亂川蜀未寧事急星火臣隨宜行事不謀副貳如寅所言罪止在臣臣請逮繫有司帝撫御牀曰當時之言天知之朕知之卿果何罪慰諭良久進拜中書平章政事一日夜半召希憲入禁中從容道藩邸時事因及趙璧所言希憲曰昔攻郭時賈似道作木柵環城一夕而成陛下顧恩從諸臣曰吾安得如似道者用之劉秉忠張易進曰山東王文統才智士也今爲李璫幕僚諂問臣臣對亦聞之實未嘗識其人也帝曰朕亦記此希憲在中書振舉綱維綜覈名實汰逐冗濫裁抑僥倖典利除害事無不便當時翕然稱治典章文物粲然可考又建言國家自開創已來凡納土及始命之臣咸令世守至今將六十年子孫皆奴視部下都邑長吏皆其皂隸僅使前古所無宜更張之使考課黜陟始議行遷轉法至元年丁母憂率親族行古喪禮勺飲不入口者三日慟則嘔血不能起寢臥草土廬於墓傍宰執以憂制未定欲極力起之相與詣廬聞號痛聲竟不忍言未幾有詔奪情起復希憲雖不敢違旨然出則素服從事入必紼絰及喪父亦如之奸臣阿合馬領左右部專總財賦會其黨相攻擊帝命中書推覆衆畏其權莫敢問希憲窮治其事以狀聞杖阿合馬罷所領歸有司帝諭希憲曰吏廢法而貪民失業而逃工不給用財不贖費先朝患此久矣自卿等爲相朕無此憂對曰陛下聖猶堯舜臣等未能以阜

陶稷契之道贊輔治化以致太平懷愧多矣今日小治未足多也因論及魏徵對曰忠臣良臣何代無之顧人主用不用爾有內侍傳旨入朝堂言某事當爾希憲曰此聞宦預政之漸不可啓也遂入奏杖之言者訟丞相史天澤親黨布列中外威權日盛漸不可制詔罷天澤政事使待鞠問希憲進曰天澤事陛下久知天澤深者無如陛下始自潛藩多經任使將兵牧民悉有治效陛下知其可付大事用爲輔相小人一旦有言陛下當熟察其心跡果有肆橫不臣者乎今日信臣故臣得預此旨他日有訟臣者臣亦遭疑矣臣等備員政府陛下之疑信若此何敢自保天澤既罷亦當罷臣帝良久曰卿且退朕思之明日帝召希憲諭曰昨思之天澤無對訟者事遂解又有訟四川帥欽察者帝敕中書急遣使誅之明日希憲覆奏帝怒曰尚爾遲回耶對曰欽察大帥以一小人言被誅民心必駭收繫至此與訟者廷對然後明其罪於天下爲宜詔遣能者按問其後事竟無實欽察得免希憲每奏議帝前論事激切無少回惜帝曰卿昔事朕王府多所容受今爲天子臣乃爾木強耶希憲對曰王府事輕天下事重一或面從天下將受其害臣非不自愛也方士請煉大丹敕中書給所需希憲具以秦漢故事奏且曰堯舜得壽不因大丹也帝曰然遂却之時方尊禮國師帝命希憲受戒對曰臣受孔子戒矣帝曰孔子亦有戒耶對曰爲臣當忠爲子當孝孔子之戒如是而已五年始建御史臺繼設各道提刑按察司時阿合馬專總財利乃曰庶務責成諸路錢穀付之轉運今繩治之如此事何由辦希憲曰

立臺察古制也內則彈劾奸邪外則察視非常訪求民瘼裨益國政無大於此若去之使上下專恣貪暴事豈可集耶阿合馬不能對七年詔釋京師繫囚西域人匿贊馬丁用事先朝資累鉅萬爲怨家所告繫大都獄既釋之矣時希憲在告實不預其事是秋車駕還上都怨家訴於帝希憲取堂判補署之曰天威莫測豈可幸其獨不署以苟免耶希憲入見以詔書爲言帝曰詔釋囚耳豈有詔釋匿贊馬丁耶對曰不釋匿贊馬丁臣等亦未聞有此詔帝怒曰汝等就稱讀書臨事乃爾宜得何罪對曰臣等忝爲宰相有罪當罷退帝曰但從汝言即與左丞相耶律鐸同罷一日帝問侍臣希憲居家何爲侍臣以讀書對帝曰讀書固朕所教然讀之而不肯用多讀何爲意責其罷政而不復求進也阿合馬因讒之曰希憲日與妻子宴樂爾帝變色曰希憲清貧何從宴設希憲嘗有疾帝遣醫三人診視醫言須用沙糖作飲時最艱得家人求於外阿合馬與之二斤且致密意希憲却之曰使此物果能活人吾終不以奸人所與求活也帝聞而遣賜之嗣國王頭輦哥行省鎮遼陽有言其擾民不便者十一年詔起希憲爲北京行省平章政事將行肩輿入辭賜坐帝曰昔在先朝卿深識事機每以帝道啓朕及鄂漢班師屢陳天命朕心不忘丞相卿實宜爲顧退托耳遼霄戶不下數萬諸王國壻分地所在彼皆素知卿能故命卿往鎮體朕此意遼東多親王使者傳令旨官吏立聽希憲至始革正之有西域人自稱駙馬營於城外繫富民誣其祖父嘗貸息錢索償甚急民訴之行省希憲命收捕之其人怒

乘馬入省堂坐榻上希憲命猝下跪而問之曰汝無私獄汝何人敢擅繫民令械繫之其人惶懼求國王亦爲之請乃稍寬令待對舉營夜遁俄詔國王歸國希憲獨行省事朝廷降鈔買馬六千五百希憲遣買於東州得羨餘馬千三百希憲曰上之則若自銜即與他郡之不及者以其直還官長公主及國壻入朝縱獵郊原擾民爲甚希憲面諭國壻欲入奏之國壻驚愕入語公主公主出飲希憲酒曰從者擾民吾不知也請以鈔萬五千貫還斂民之直幸勿遣使者自是貴人過者皆莫敢縱十二年右丞阿里海牙下江陵圖地形上於朝請命重臣開大府鎮之帝急召希憲還使行省荆南賜坐諭曰荆南入我版籍欲使新附者感恩未來者向化未知我朝有臣如此亦足以降其心南土卑濕於卿非宜今以大事付託度卿不辭賜田以養居者馬五十以給從者希憲曰臣每懼才識淺近不能勝負大任何敢辭疾然敢辭新賜復有詔令希憲承制授三品以下官希憲冒暑疾驅以進至鎮阿里海牙率其屬郊迎望拜塵中荆人大駭即日禁剽奪通商販興利除害兵民安堵首錄宋故宣撫制置二司幕僚能任事者以備采訪仍擇二十餘人隨材授職左右難之希憲曰今皆國家臣子也何用致疑時宋故官禮謁大府必廣致珍玩希憲拒之且語之曰汝等身仍故官或不次遷擢當念聖恩盡力報効今所饋者若皆己物我取之爲非義一或係官事同盜竊若斂於民不爲無罪宜戒慎之皆感激謝去令凡俘獲之人敢殺者以故殺平民論爲軍士所虜病而棄之者許人收養病愈故主不得復

有立契券質賣妻子者重其罪仍沒入其直先時江陵城外畜水捍禦希憲命決之得良田數萬畝以爲貧民之業發沙市倉粟之不入官籍者二十萬斛以賑公安之饑大綱既舉乃曰教不可緩也遂大興學選教官置經籍旦日親詣講舍以厲諸生西南溪洞及思播田楊二氏重慶制置趙定應俱越界請降事聞帝曰先朝非用兵不可得地今希憲能令數千里外越境納土其治化可見也關吏得江陵人私書不敢發上之樞密臣發之帝前其書有曰歸附之初人不聊生皇帝遣廉相出鎮荆南豈惟人漸德化昆蟲草木咸被澤矣帝曰希憲不嗜殺人故能爾也希憲疾久不愈十五年春近臣董文忠言江陵濕熱如希憲病何即召希憲還江陵民號泣遮道留之不得相與畫像建祠希憲還囊蕭然琴書自隨而已帝知其貧特賜白金五千兩鈔萬貫五月至上都太常卿田忠良來問疾希憲謂曰上都聖上龍飛之地天下視爲根本近聞龍岡遺火延燒民居此常事耳慎勿令妄談地理者惑動上意未幾果有數輩以徒置都邑事奏樞密副使張易中書左丞張文謙與之廷辨力言不可帝不悅明日召忠良質其事忠良以希憲語對帝曰希憲病甚猶慮及此耶其議遂止詔徵揚州名醫王仲明視希憲疾既至希憲服其藥能杖而起帝喜謂希憲曰卿得良醫疾向愈矣對曰醫特善藥以療臣疾苟能戒慎則誠如聖諭設或肆情良醫何益蓋以醫諷諫也會議立門下省帝曰侍中非希憲不可遣中使諭旨曰鞍馬之任不以勞卿坐而論道時至省中事有必須執奏肩輿以入可也希憲

附奏曰臣疾何足卹輸忠効力生平所願皇太子亦遣人諭旨曰上命卿領門下省無憚羣小吾爲卿除之竟爲阿合馬所沮十六年春賜鈔萬貫詔復入中書希憲稱疾薦皇太子遣侍臣問疾因問治道希憲曰君天下在用用人用君子則治用小人則亂臣病雖劇委之於天所甚憂者大奸專政羣小阿附誤國害民病之大者殿下宜開聖意急爲屏除不然日就沉痾不可藥矣戒其子曰丈夫見義勇爲禍福無預於己謂羣孽稷契伊傳周召爲不可及是自棄也天下事苟無牽制三代可復也又曰汝讀狄梁公傳乎梁公有大節爲不肯子所堅汝輩宜慎之十七年十一月十九夜有大星隕於正寢之旁流光照地久之方滅是夕希憲卒年五十大德八年贈忠清粹德功臣太傅開府儀同三司追封魏國公諡文正加贈推忠佐理翊運功臣太師開府儀同三司上柱國恆陽王諡如故

張文謙

按元史本傳文謙字仲謙邢州沙河人幼聰敏善記誦與太保劉秉忠同學世祖居潛邸受邢州分地秉忠薦文謙可用歲丁未召見應對稱旨命掌王府書記日見信任邢州當要衝初分二千戶爲勳臣食邑歲遣人監領皆不知撫治徵求百出民弗堪命或訴於王府文謙與秉忠言於世祖曰今民生困弊莫邢爲甚蓋擇人往治之責其成效使四方取法則天下均受賜矣於是乃選近侍脫兀脫尚書劉肅侍郎李簡往三人至邢協心爲治洗滌蠹敝革去貪暴流亡復歸不期月戶增十倍由是世祖益重儒士任之以

政皆自文謙發之歲辛亥憲宗即位文謙與秉忠數以時務所當先者言於世祖悉施行之世祖征大理國主高祥拒命殺信使遁去世祖怒將屠其城文謙與秉忠姚樞諫曰殺使拒命者高祥爾非民之罪請宥之由是大理之民賴以全活己未世祖帥師伐宋文謙與秉忠言王者之師有征無戰當一視同仁不可嗜殺世祖曰期與卿等守此言既入宋境分命諸將毋妄殺毋焚人室廬所獲生口悉縱之中統元年世祖即位立中書省首命王文統爲平章政事文謙爲左丞建立綱紀講明利病以安國便民爲務詔令一出天下有太平之望而文統素忌克諫謀之隱屢相可否積不能平文謙遽求出詔以本官行大名等路宣撫司事臨發語文統曰民困日久况當大旱不量減稅賦何以慰來蘇之望文統曰上新即位國家經費止仰稅賦苟復減損何以供給文謙曰百姓足君孰與不足俟時和歲豐取之未晚也於是獨常賦什之四商酒稅什之一二年春來朝復留居政府始立左右部講行庶務鉅細畢舉文謙之力爲多三年阿合馬領左右部總司財用欲專奏請不關白中書詔廷臣議之文謙曰分制財用古有是理中書不預無是理也若中書弗問天子將親蒞之乎帝曰仲卿言是也至元元年詔文謙以中書左丞行省西夏中興等路羌俗素鄙野事無統紀文謙得蜀士陷於俘虜者五六人理而出之使習吏事旬月間簿書有品式子弟亦知讀書俗爲一變浚唐來漢二渠溉田十數萬頃人蒙其利三年還朝諸勢家言有戶數千當役屬爲私奴者議久不決文謙謂以乙未歲戶帳

爲斷奴之未占籍者歸之勢家可也其餘良民無爲奴之理議遂定守以爲法五年滿州妖人胡王惑衆事覺逮捕百餘人丞相安童以文謙言奏曰愚民無知爲所誑誘誅其首惡足矣詔即命文謙往決其獄惟三人坐棄市餘皆釋之七年拜大司農卿奏立諸道勸農司巡行勸課請開藉田行祭先農先蠶等禮復與寶默等請立國子學詔以許衡爲國子祭酒選貴胄子弟教育之時阿合馬議拘民間鐵官鑄農器高其價以配民創立行戶部於東平大名以造鈔及諸路轉運司干政害民文謙悉於帝前極論罷之十三年遷御史中丞阿合馬慮憲臺發其姦乃奏罷諸道按察司以據之文謙奏復其舊然自知爲姦臣所忌力求去會世祖以大明曆歲久浸差命許衡等造新曆乃授文謙昭文館大學士領太史院以總其事十九年拜樞密副使歲餘以疾薨於位年六十八文謙蚤從劉秉忠洞究術數晚交許衡尤粹於義理之學爲人剛明簡重凡所陳於上前莫非堯舜仁義之道數件權倖而是非得喪一不以意意家惟藏書數萬卷尤以引薦人材爲己任時論益以是多之累贈推誠同德佐運功臣太師開府儀同三司上柱國追封魏國公諡忠宣

耶律鐸

按元史耶律鐸材傳楚材子鐸字成仲幼聰敏善屬文尤工騎射楚材薨嗣領中書省事時年二十三鐸上言宜疎禁網遂采歷代德政合於時宜者八十一章以進戊午憲宗征蜀詔鐸領侍衛驍果以從屢出奇計攻下城邑賜以尚方金鎖甲及內廐驄馬乙未

憲宗崩阿里不哥叛鑄棄妻子挺身自朔方來歸世祖嘉其忠即日召見賞賜優厚中統二年拜中書左丞相是年冬詔將兵備禦北邊後徵兵扈從敗阿里不哥於上都之北至元元年加光祿大夫奏定法令三十七章吏民便之二年行省山東未幾徵還初清廟雅樂止有登歌詔鑄製宮懸八佾之舞四年春三月樂舞成表上之仍請賜名大成制曰可六月改築祿大夫平章政事五年復拜光祿大夫中書左丞相十年遷平章軍國重事十三年詔監修國史朝廷有大事必咨訪焉十九年復拜中書左丞相二十年冬十月坐不納職印妄奏東平人聚謀為逆問謀幕僚及黨罪囚阿里沙遂罷免仍沒其家貲之半徙居山後二十二年卒年六十五子十一人希徵希勃希亮希寬希素希固希周希光希逸希進希東宣慰使餘失其名至順元年贈推忠保德宣力佐治功臣太師開府儀同三司上柱國懿寧王諡文忠

劉秉忠

按元史本傳秉忠字仲晦初名侃因從釋氏又名子聰拜官後始更今名其先瑞州人也世仕遼為官族曾大父仕金為邢州節度副使因家焉故自大父澤而下遂為邢人庚辰歲木華黎取邢州立都元帥府以其父潤為都統事定改署州錄事歷鉅鹿內丘兩縣提領所至皆有惠愛秉忠生而風骨秀異志氣英爽不羈八歲入學日誦數百言年十三為質子於帥府十七為邢臺節度使府令史以養其親居常鬱鬱不樂一日投筆嘆曰吾家累世衣冠乃汨沒為刀筆吏乎丈夫不過於世當隱居以求志耳即棄去隱武

安山中久之天寧虛照禪師遣徒招致為僧以其能文詞使掌書記後遊雲中留居南堂寺世祖在潛邸海雲禪師被召過雲中聞其博學多材藝邀與俱行既入見應對稱旨屢承顧問秉忠於書無所不讀尤遠於易及邵氏經世書至於天文地理律曆三式六壬遁甲之屬無所不精通論天下事如指諸掌世祖大愛之海雲南還秉忠遂留藩邸後數歲奔父喪賜金百兩為葬具仍遣使送至邢州服除復被召奉旨還和林上書數千百言其略曰典章禮樂法度三綱五常之教備於堯舜三王因之五霸敗之漢興以來至於五代一千三百餘年由此道者漢文景光武唐太宗元宗五君而元宗不無疵也然治亂之道係乎天而由乎人天生成吉思皇帝起一旅降諸國不數年而取天下勤勞憂苦遺大賁於子孫庶傳萬祀永保無疆之福愚聞之曰以馬上取天下不可以馬上治昔武王兄也周公弟也周公思天下善事夜以繼日每得一事坐以待旦以匡周室以保周天下八百餘年周公之力也君上兄也大王弟也思周公之故事而行之在乎今日千載一時不可失也君之所任在內莫大乎相相以領百官化萬民在外莫大乎將將以統三軍安四域內外相濟國之急務必先之也然天下之大非一人之可及萬事之細非一心之可察當擇開國功臣之子孫分為京府州郡監守督責舊官以遵王法仍差按察官守治者升否者黜天下不勞力而定也天下戶過百萬自忽都那演斷事之後差徭甚大加以軍馬調發使臣煩擾官吏乞取民不能當是以逃竄宜比舊減半或三分去一就見在

之民以定差稅招逃者復業再行定奪官無定次清潔者無以遷汙濫者無以降可比附古例定百官爵祿儀仗使家足身貴有犯於民設條定罪威福者君之權奉命者臣之職今百官自行威福進退生殺惟意之從宜從禁治天下之民未聞教化見在囚人宜從赦免明施教令使之知畏則犯者自少也教令既設則不宜繁因大朝舊例增益民間所宜設者十數條足矣教令既施罪不至死者皆提察然後決犯死刑者覆奏然後聽斷不致刑及無辜天子以天下為家兆民為子國不足取於民民不足取於國相須如魚水有國家者置府庫設倉廩亦為助民民有身者營產業闢田野亦為資國用也今宜打算官民所欠債負若實為應當差發所借依合罕皇帝聖旨一本一利官司歸還凡賠償無名虛契所負及還過元本者並行赦免納糧就遠倉有一磨十者宜從近倉以輸為便當驛路州城飲食祇待偏重宜計所費以準差發關市津梁正稅十五分取一宜從舊制禁橫取減稅法以利百姓倉庫加耗甚重宜令權量度均為一法使錙銖圭撮尺寸皆平以存信去詐珍貝金銀之所出淘砂鍊石實不易為一旦以纏絲縷飾皮革塗木石粧器仗取一時之華麗廢為塵而無濟甚可惜也宜從禁治除帝胄功臣大官以下草服有制外無職之人不得僭越今地廣民微賦斂繁重民不聊生何力耕耨以厚產業宜差勸農官一員率天下百姓務農桑營產業實國家之大益古者庠序學校未嘗廢今郡縣雖有學並非官置宜從舊制修建三學設教授開選擇才以經義為上詞賦論策次之兼科

舉之設已奉合罕皇帝聖旨因而言之易行也開設學校宜擇開國功臣子孫受教選達才任用之天下莫大於朝省親民莫近於縣宰雖朝省有法縣宰宜擇縣宰正民自安矣關西河南地廣土沃以軍馬之所出入治而未豐宜設官招撫不數年民歸土闢以資軍馬之用實國之大事移刺中丞拘權鹽鐵諸產商賈酒醋貨施諸事以定宣課雖使從實快辦不足亦取於民地兌不辦已不為輕輿魯合蠻奏請於舊額加倍權之往往科取民間科權竝行民無所措手足宜從舊例辦權更或減輕罷繁碎止科征無從獻利之徒削民害國錄寡孤獨廢疾者宜設孤老院給衣糧以為養使臣到州郡宜設館不得於官衙民家安下孔子為百王師立萬世法今廟堂雖廢存者尚多宜令州郡祭祀釋奠如舊儀近代禮樂器具靡散宜令刷會徵太常舊人教引後學使器備人存漸以修之實太平之基王道之本今天下廣遠雖成吉思皇帝威福之致亦天地神明陰所祐也宜訪名儒循舊禮尊祭上下神祇和天地之氣順時序之行使神享民依德極於幽明天下賴一人之慶見行遼曆日月交食頗差聞司天臺改成新曆未見施行宜因新君即位頒曆改元令京府州郡置更漏使民知時國滅史存古之常道宜撰修金史令一代君臣事業不墜於後世甚有屬也國家廣大如天萬中取一以養天下名士宿儒之無營運產業者使不致困窮或有營運產業者會前聖旨種養應輸差稅其餘大小雜泛並行蠲免使自給養實國家養才勵人之大也明君用人如大匠用材隨其巨細長短以施規矩繩墨

孔子曰君子不可小知而可大受小人不可大受而可小知蓋君子所存者大不能盡小人之事或有一短小人所拘者狹不能同君子之量或有一長盡其才而用之成功之道也君子不以言廢人不以人廢言大開言路所以成天下安兆民也天地之大日月之明而或有所蔽且蔽天之明者雲霧也蔽人之明者私欲佞說也常人有之蔽一心也人君有之蔽天下也常選左右諫臣使諷諭於未形付畫於至密也君子之心一於理義懷於忠良小人之心一於利欲懷於讒佞君子得位有容於小人小人得勢必排於君子明君在上不可不辨也孔子曰遠佞人又曰惡利口之覆邦家者此之謂也今言利者衆非圖以利國害民實欲殘民而自利也宜將國中人民必用場冶付各路課稅所以定權辦其餘言利者並行罷去古者明王不寶遠物所寶惟賢如使賢者在位能者在職此皆一人之睿知賢王之輔成也古者治世均民產業自廢井田為阡陌後世因之不能復今窮乏者益損富盛者增加宜禁行利之人勿恃官勢居官在位者勿侵民利商賈與民和好交易不生擅奪欺罔之害真國家之利也答筆之制宜會古酌今均為一法使無敢過越禁私置牢獄淫民無辜鞭背之刑宜禁治以彰愛生之德立朝省以統百官分有司以御衆事以至京府州縣親民之職無不備紀綱正於上法度行於下是故天下不勞而治也今新君即位之後可立朝省以為政本其餘百官不在員多惟在得人焉耳世祖嘉納焉又言邢州舊萬餘戶兵興以來不滿數百凋壞日甚得良牧守如真定張耕洛水

劉肅者治之猶可完復朝廷即以耕為邢州安撫使肅為副使由是流民復業升邢為順德府癸丑從世祖征大理明年征雲南每贊以天地之好生王者之神武不殺故克城之日不妄戮一人己未從伐宋復以雲南所言贊於上所至全活不可勝計中統元年世祖即位問以治天下之大經養民之良法肅忠采祖宗舊典恭以古制之宜於今者條列以聞於是下詔建元紀歲立中書省宜撫司朝廷舊臣山林遺逸之士咸見錄用文物粲然一新肅忠雖居左右而猶不改舊服時人稱之為總書記至元元年翰林學士承旨王鶚奏言肅忠久侍藩邸積有歲年參帷幄之密謀定社稷之大計忠勤勞績宜被褒崇聖明御極萬物維新而肅忠猶仍其野服散號深所未安宜正其衣冠崇以顯秩帝覽奏即日拜光祿大夫位太保參預中書省事詔以翰林侍讀學士肅忠之女妻之賜第奉先坊且以少府官籍監戶給之肅忠既受命以天下為己任事無巨細凡有關於國家大體者知無不言言無不聽帝寵任愈隆燕閑顧問輒推薦人物可備器使者凡所甄拔後悉為名臣初帝命肅忠相地於桓州東灤水北建城郭於龍岡三年而畢名曰開平繼升為上都而以燕為中都四年又命肅忠築中都城始建宗廟宮室八年奏建國號曰大元而以中都為大都他如頒章服舉朝儀給俸祿定官制皆自肅忠發之為一代成憲十一年扈從至上都其地有南屏山營築精舍居之秋八月肅忠無疾端坐而卒年五十九帝聞驚悼謂羣臣曰肅忠事朕三十餘年小心慎密不避艱險言無隱情其陰陽術數之

精占事知來若合符契惟朕知之他人莫得聞也出
內府錢具棺斂遣禮部侍郎趙秉溫護其喪還葬大
都十二年贈太傅封趙國公諡文貞成宗時贈太師
諡文正仁宗時又進封常山王秉忠自幼好學至老
不衰雖位極人臣而齋居蔬食終日澹然不異平昔
自號藏春散人每以吟咏自適其詩蕭散閑淡類其
爲人有文集十卷無子以弟秉恕子蘭璋嗣

欽定古今圖書集成明倫彙編官常典

第二百四十卷目錄

公輔部名臣列傳六十

元二

安童

商挺

不忽木

何榮祖

完澤

賀勝

孟述思

宋子貞

馬紹

葉李

鐵哥

張九思

官常典第二百四十卷

公輔部名臣列傳六十

元二

安童

按元史本傳安童木華黎四世孫霸突魯長子也中統初世祖追錄元勳召入長宿衛年方十三位在百寮上母弘吉刺氏昭膺皇后之姊通籍禁中世祖一日見之問及安童對曰安童雖幼公輔器也世祖曰何以知之對曰每退朝必與老成人語未嘗押一年

少是以知之世祖悅四年執阿里不哥黨千餘將置之法安童侍側帝語之曰朕欲置此屬於死地何如對曰人各爲其主陛下甫定大難遽以私憾殺人將何以懷服未附帝驚曰卿年少何從得老成語此言正與朕意合由是深重之至元二年秋八月拜光祿大夫中書右丞相增食邑至四千戶辭曰今三方雖定江南未附臣以年少謬膺重任恐四方有輕朝廷心帝動容有間曰朕思之熟矣無以踰卿冬十月召許衡至傳旨令衡入省議事衡以疾辭安童即親候其館與語良久既還念之不釋者累日三年帝諭衡曰安童尚幼未更事善輔導之汝有嘉謨當先告之以達朕朕將擇焉衡對曰安童聰敏且有執守告以古人所言悉能領解臣不敢不盡心但慮中有人間之則難行外用勢力納人其中則難行臣入省之日淺所見如此四年三月安童奏內外官須用老成人宜令儒臣姚樞等入省議事帝曰此輩雖閒猶當優養其令入省議事五年廷臣密議立尚書省以阿合馬領之乃先奏以安童宜位三公事下諸儒議商挺倡言曰安童國之柱石若爲三公是崇以虛名而實奪之權也甚不可衆曰然事遂罷七年四月奏曰臣近言尚書省樞密院各令奏事竝如常制其大政令從臣等議定然後上聞既得旨矣今尚書一切徑奏似違前旨帝曰豈阿合馬以朕頗信用之故爾專權耶不與卿議非是敕如前旨八年陝西省臣也速迭兒建言比因饑饉盜賊滋橫若不顯戮一二無以示懲敕中書詳議安童奏曰強竊均死恐非所宜罪至死者宜仍舊待報從之十年春三月奏以玉冊玉寶

上皇后弘吉刺氏以玉冊金寶立燕王爲皇太子兼中書令判樞密院事冬十月帝諭安童及伯顏等曰近史天澤姚樞暴定新格朕已親覽皆可行之典汝等當一一畱心參考豈無一二可增減者各令紀錄促議行之時天下待報死囚五十人安童奏其中十三人因闖殿殺人餘無可疑於是詔以所奏十三人免死從軍十一年奏阿合馬蠹國害民數事又奏各部與大都路官多非才乞加黜汰從之十二年七月詔以行中書省樞密院事從太子北平王出鎮極邊在邊十年二十一年三月從王歸侍罪闕下帝即召見慰勞之頓首謝曰臣奉使無狀有累聖德遂留殿語至四鼓乃出冬十一月和禮霍孫罷復拜中書右丞相加金紫光祿大夫二十二年右丞相盧世榮敗詔與諸儒條其所用人及所爲事悉罷之二十三年夏中書奏擬漕司諸官姓名帝曰如平章右丞等朕當親擇餘皆卿等職也安童奏曰比聞聖意欲倚近侍爲耳目臣猥承任使若所行非法從其舉奏罪之輕重惟陛下裁處今近臣乃何隙援引非類曰某居某官某居某職以所署奏目付中書施行臣謂銓選之法自有定制其尤無事例者臣常廢格不行慮其黨有短臣者幸陛下詳察帝曰卿言是也今後若此者勿行其妄奏者即入言之奏徵前吏部尚書李昶不起復奏賜田十頃二十四年宗王乃顏叛世祖親討平之宗室誣誤者命安童按問多所平反常退朝自左掖門出諸免罪者爭迎謝或執轡扶上馬安童毅然不顧有乘間言於帝曰諸王雖有罪皆帝室近親也丞相雖尊人臣也何恃慢如此帝良久曰汝等

小人豈知安童所爲特辱之使改過耳是歲復立尚書省安童切諫曰臣力不能回天乞不用桑哥別相賢者猶或不至虐民誤國不聽二十五年見天下大權盡歸尚書屢求退不許二十八年罷相仍領宿衛事三十年春正月以疾薨於京師樂安里第年四十九雨木冰三日世祖震悼曰人言丞相病朕固弗信果喪予良弼帝大臣監護喪事大德七年成宗制贈推忠同德翊運功臣太師開府儀同三司上柱國東平忠憲王碑曰開國元勳命世大臣之碑子兀都帶兀都帶器度宏達世祖時襲長宿衛父安童歿凡贈賻之物一無所受以素車僕馬歸葬只蘭禿先塋事母以孝聞成宗即位拜銀青榮祿大夫大司徒領太常寺事爲請諡尚郊攝太尉奉冊上尊號廟號皇后尊號常侍掖庭贊畫大政帝及中宮咸以家人禮待之大德六年正月薨年三十一至大二年制贈輸誠保德翊運功臣太師開府儀同三司上柱國東平王諡忠簡 按丘處機傳有祈志誠者居雲州金閣山道譽甚著丞相安童嘗過而問之志誠告以修身治世之要安童感其言故其相世祖也以清靜忠厚爲主及罷還第退然若無與於世者人以爲有得於志誠之言其後安童復被召入相辭不可遂往決於志誠志誠曰昔與子同列者何人今同列者何人安童悟入見世祖辭曰臣昔爲宰相年少幸不失陛下事者丞佐皆臣所師友今事臣者皆進與臣俱則臣之爲政能有加於前乎世祖曰誰爲卿言是對曰祈眞人世祖嘆異者久之

孟速思

按元史本傳孟速思畏兀人世居別失八里古北庭都護之地幼有奇質年十五盡通本國書太祖聞之召至闕下一見大悅曰此兒目中有火它日可大用以授睿宗使視顯懿莊聖皇后分邑歲賦復事世祖於潛藩日見親用憲宗崩孟速思言於世祖曰神器不可久曠太祖嫡孫雅王最長且賢宜卽皇帝位諸王塔察兒也孫哥合丹等咸是其言世祖卽位睿順益重南征時與近臣不只兒爲斷事官及諸王阿里不哥叛相拒漠北不只兒有二心孟速思知之奏徙之於中都親監護以往帝以爲忠數命收召豪俊凡所引薦皆極其選詔與安童並拜丞相固辭帝語安童及丞相伯顏御史大夫月魯那演等曰賢哉孟速思求之彼族誠爲罕也孟速思爲人剛嚴謹信巖居帷幄謀議世莫得聞至元四年卒年六十有二帝尤哀悼特諡敏惠武宗朝贈推忠同德佐理功臣太師開府儀同三司上柱國追封武都王改諡智敏

商挺

按元史本傳挺字孟卿曹州濟陰人其先本姓殷氏避宋諱改焉父衡僉陝西行省員外郎以戰死挺年二十四汴京破北走依寇氏趙天錫與元好問楊奐遊東平嚴實聘爲諸子師實卒子忠濟嗣辟挺爲經歷出爲曹州判官未幾復爲經歷歷歷忠濟與學養士癸丑世祖在潛邸受京兆分地聞挺召遣使徵至鹽州入對稱旨字而不名問陪宴語因曰挺來時李璫城胸山東平當餽米萬石東平至胸山率十石致一石且車淖於雨必後期後期罪死請輸沂州使理軍取食便世祖曰愛民如此忍不卿從楊惟中宣撫關

中挺爲郎中兵火之餘八州十二縣戶不滿萬皆驚憂無聊挺佐惟中進賢良勸食暴明尊卑出淹滯定規程主簿責印楮幣頒俸祿務農薄稅通其有無期月民乃安誅一大猾羣吏咸懼且請減關中常賦之半明年惟中罷廉希憲來代陞挺爲宣撫副使丙辰徵京兆軍需布萬疋米三千石帛三千段械器稱是輸平涼軍期迫甚郡人大恐挺曰他易集也運米千里妨我蠶麥郡長王姓者平涼人也挺召與謀對曰不煩官運僕家有積粟請以代輸挺大悅載價與之他輸亦如期復命兼治懷孟境內大治丁巳憲宗命阿藍答兒會討河南陝右戊午罷宣撫司挺還東平憲宗親征蜀世祖將趨鄂漢軍於小濮召問軍事挺對曰蜀道險遠萬乘豈宜輕動世祖默然久之曰卿言正契吾心憲宗崩世祖北還道遺張文謙與挺計事挺曰軍中當嚴符信以防姦詐文謙急追及言之世祖大悟罵曰無一人爲我言此非商孟卿幾敗大計速遣使至軍立約未幾阿里不哥之使至軍中執而斬之召挺北上至開平挺與廉希憲密贊大計世祖既卽位挺奏曰南師宜還寇乘輿西師宜軍便地從之以廉希憲及挺宣撫陝屬中統元年夏五月至京兆哈刺不花者征蜀時名將也渾都海嘗爲之副時駐六盤山以兵應阿里不哥挺謂希憲曰爲六盤者有三策悉銳而東直擣京兆上策也聚兵六盤觀變而動中策也重裝北歸以應和林下策也希憲曰彼將何從挺曰必出下策已而果然於是與希憲定議令八春汪良臣發兵禦之事具希憲傳六盤之兵旣北而阿藍答兒自和林引兵南來與哈刺不花渾

都海遇於甘州哈刺不花以語不合引其兵北去阿藍答兒遂與渾都海合軍而南時諸王合丹率騎兵與八春汪良臣兵合乃分爲三道以拒之既陣大風吹沙良臣令軍士下馬以短兵突其左繞出陣後潰其右而出八春直擣其前合丹勒精騎邀其歸路大戰於甘州東殺阿藍答兒渾都海事聞帝大悅曰商孟卿古之良將也改宣撫司爲行中書省進希憲爲右丞挺爲僉行省事二年進參知政事宋將劉整以瀘州降繫前降宋者數百人來歸軍吏請誅以戒挺盡奏而釋之與元判官費寅有罪懼誅以借兵完城事訟挺與希憲於朝帝召挺便殿問曰卿在關中懷孟兩著治効而毀言日至豈同寅有沮卿者耶抑位高而志怠耶比年論王文統者甚衆卿獨無言挺對曰臣素知文統之爲人嘗與趙璧論之想陛下猶能記也臣在秦二年多過其或從權以應變者有之若功成以歸已事敗分咎於人臣必不敢請就戮挺既出帝顧駙馬忽剌出樞副合答等數挺前後大計凡十有七因嘆曰挺有功如是猶自言有罪若此誰復爲朕戮力耶卿等識之四年賜金符行四川行樞密院事至元元年入拜參知政事建議史事附修遼金二史宜令王鶚李治徐世隆高鳴胡祜通周砥等爲之甚合帝意二年分省河東俄召還三年帝畱意經學挺與姚樞實默王鶚楊果纂五經要語凡二十八類以進六年同食樞密院事七年遷僉書八年陞副使數軍食定軍官品級給軍吏四千人屯田開墾三萬畝收其穫以餉親軍汰不勝軍者戶三萬戶一丁者亦汰去丁多業募業多丁寡財力相資合出一軍

九年封皇子忙阿剌爲安西王立王相府以挺爲王相十四年詔王北征王命挺曰關中事有不便者可悉更張之挺曰延安兵數千宜使李忽蘭吉練習之以備不虞未幾秃魯叛以延安兵應敵果獲其力挺進十策於王曰睦親鄰安人心敬民時備不虞厚民生一事權清心源謹自治固本根察下情王爲置酒嘉納王薨王妃使挺請命於朝以子阿難答嗣帝曰年少祖宗之訓未習卿姑行王相府事初運使郭琮郎中郭叔雲與王相趙炳構隙或告炳不法妃命囚之六盤獄以死朝廷疑擅殺之執琮叔雲鞠問伏辜事具趙炳傳初無一毫及挺惟王府女奚徹徹以預二郭謀臨刑望以求生始有曖昧語連挺及其子獻帝怒召挺拘炳家獻下獄帝命趙氏子曰商孟卿老書生可與諸儒識其罪吏部尚書青陽夢炎以議動奏曰臣宋儒不知挺向來之功可補今之過否帝不悅曰是同類相助之辭也符寶郎董文忠奏曰夢炎不知挺何如人臣以曩時推戴之功語之矣帝良久曰其事果何如對曰臣目未親耳固聞之殺人之謀挺不與也帝默然十六年春有旨挺不可全以無罪釋之籍其家是冬始釋挺及獻二十年復樞密副使俄以疾免二十一年趙氏子復訟父冤挺又被繫百餘日乃釋二十五年帝問中丞董文用曰商孟卿今年幾何文用對曰今年八十帝甚惜其老而嘆其康強是歲冬十有二月卒有詩千餘篇尤善隸書延祐初贈推誠協謀佐運功臣太師開府儀同三司上柱國魯國公諡文定

宋子貞

按元史本傳子貞字周臣潞州長子人也性敏悟好學工詞賦弱冠領薦書試禮部與族兄知柔同補太學生俱有名於時人以大小宋稱之金末潞州亂子貞走趙魏間宋將彭義斌守大名辟爲按撫司計議官義斌歿子貞率衆歸東平行臺嚴實素聞其名招置幕府用爲詳議官兼提舉學校先是實每令人請事於朝托近侍奏決不經中書因與丞相耶律楚材有違言子貞至勸實致禮丞相通懇懇凡奏請必先咨稟丞相喜自是交權無間實因此益委信子貞太宗四年實戍黃陵金人悉力來攻與戰不利敵勢頗張曹濮以南皆震有自敵中逃歸者言金兵且大至人情恟懼子貞請於實斬揚言者首以令諸城境內乃安汴梁既下饑民北徙餓殍盈道子貞多方賑救全活者萬餘人金士之流寓者悉引見周給且薦用之拔名儒張特立劉肅李昶輩於羈旅與之同列四方之士聞風而至故東平一時人材多於他鎮七年太宗命子貞爲行臺右司郎中中原略定事多草創行臺所統五十餘城州縣之官或擢自將校或起由民伍率昧於從政甚者專以培克聚斂爲能官吏相與爲食私以病民子貞做前代觀察采訪之制命官分三道糾察官吏立爲程式與爲期會黜貪情獎廉勤官府始有紀綱民得蘇息東平將校占民爲部曲戶謂之脚寨擅其賦役後四百所子貞請罷歸州縣實初難之子貞力言乃聽人以爲便實卒子忠濟襲爵尤敬子貞請於朝授參議東平路事兼提舉太常禮樂子貞作新廟學延前進士康鵬王磐爲教官招致生徒幾百人出粟贖之俾習經藝每季程試必

親臨之齊魯儒風爲之一變歲己未世祖南伐名子貞至濮問以方略對曰本朝威武有餘仁德未洽所以拒命者特畏死爾若投降者不殺脅從者勿治則宋之都邑可傳檄而定也世祖善其言中統元年授益都路宣撫使未幾入覲拜右三部尚書時新立省部典章制度多子貞裁定李壇叛據濟南詔子貞參議軍前行中書省事子貞單騎至濟南觀壇形勢因說丞相史天澤曰壇擁衆東來坐守孤城宜增築外城防其奔突彼糧盡援絕不攻自破矣議與天澤合遂擒壇子貞還上書陳便宜十事大略謂官爵人主之柄選法宜盡歸吏部律令國之紀綱宜早刊定監司總統一路用非其材不厭人望乞選公廉有才德者爲之今州縣官相傳以世非法賦斂民窮無告宜遷轉以革其弊又請建國學教胄子敕州郡提學課試諸生三年一貢舉有旨命中書次第施行之至元二年始罷州縣官世襲遣子貞與左丞相耶律鑄行山東遷調所部官還授翰林學士參議中書省事奏請班俸祿定職田從之俄拜中書平章政事復陳時務之切要者十二策帝頗悔用子貞晚未幾以年老求退帝曰卿氣力未衰勉爲朕置措置大事俟百司差有條理聽卿自便三年十一月懇辭乃得請特敕中書凡有大事即其家訪問子貞私居每聞朝廷事不便必封疏上奏愛君憂國不以進退異其心卒年八十一始病家人進醫藥却之曰死生有命吾年踰八十何以藥爲病危諸子請遺言子貞曰吾平昔教汝者不少今尚何言耶

不忽木

按元史本傳不忽木一名時用字用臣世爲康里部大人康里即漢高車國也祖海藍伯嘗事克烈王可汗王可汗滅即棄家從數千騎望西北馳去太祖遣使招之答曰昔與帝同事王可汗今王可汗既亡不忍改所事遂去莫知所之子十人皆爲太祖所薦燕真最幼年方六歲太祖以賜莊聖皇后后憐而育之遣侍世祖於藩邸長從征伐有功世祖威名日盛憲宗將伐宋命以居守燕真曰主上素有疑志今乘輿遠涉危難之地殿下以皇弟獨處安全可乎世祖然之因請從南征憲宗喜即分兵命趨鄂州而自將攻蜀之釣魚山令阿里不哥居守憲宗崩燕真統世祖雷部覺阿里不哥有異志奉皇后稍引而南與世祖會於上都世祖即位燕真未及大用而卒官止衛率不忽木其仲子也食稟英特進止詳雅世祖奇之命給事裕宗東宮師事太子贊善王恂恂從北征乃受學於國子祭酒許衡日記數千言衡每稱之以爲有公輔器世祖嘗欲觀國子所書字不忽木年十六獨書貞觀政要數十事以進帝知其寓規諫意嘉歎久之衡纂歷代帝王名號統系歲年爲書授諸生不忽木讀數過即成誦帝名試不遺一字至元十三年與同舍生堅童太蒼充魯等上疏曰臣等聞之學記曰君子如欲化民成俗其必由學乎玉不琢不成器人不學不知道故古之王者建國君民教學爲先蓋自堯舜禹湯文武之世莫不有學故其治隆於上俗美於下而爲後世所法降至漢朝亦建學校詔諸生課試補官魏道武帝起自北方既定中原增置生員三千儒學以興此歷代皆有學校之證也臣等今復取

平南之君建置學校者爲陛下陳之晉武帝嘗平吳矣始起國子學隋文帝嘗滅陳矣俾國子寺不隸太常唐高祖嘗滅梁矣詔諸州縣及鄉並令置學及至太宗數幸國學增築學舍至二百間國學大學四門學亦增生員其書算各置博士乃至高麗百濟新羅高昌吐蕃諸國酋長亦遣子弟入學國學之內至八千餘人高宗因之遂令國子監領六學一曰國子學二曰太學三曰四門學四曰律學五曰書學六曰算學各置生徒有差皆承高祖之意也然晉之平吳得戶五十二萬而已隋之滅陳得郡縣五百而已唐之滅梁得戶六十餘萬而已而其崇重學校已如此況我堂堂大國奄有江嶺之地計亡宋之戶不下千萬此陛下神功自古未有而非晉隋唐之所敢比也然學校之政尚未全舉臣竊惜之臣等竊被聖恩俾習儒學欽惟聖意豈不以諸色人仕宦者常多蒙古人仕宦者尚少而欲臣等曉識世務以任陛下之使令乎然以學制未定朋從數少譬猶責嘉禾於數苗求良驥於數馬臣等恐其不易得也爲今之計如欲人材衆多通習漢法必如古昔偏立學校然後可若曰未暇宜且於大都弘闡國學擇蒙古人年十五以下十歲以上質美者百人百官子弟與凡民俊秀者百人俾康給各有定制選德業充備足爲師表者充司業博士助教而教育之使其教必本於人倫明乎物理爲之講解經傳授以修身齊家治國平天下之道其下復立數科如小學律書算之類每科設置教授各令以本業訓導小學科則令讀誦經書教以應對進退事長之節律科則專令通曉吏事書科則專

今職習字畫算科則專令熟閑算數或一藝通然後
改授或一日之間更次爲之俾國子學官總領其事
常加點勘務要俱通仍以義理爲主有餘力者聽令
學作文字日月歲時隨其利鈍各責所就功課程其
勤惰而賞罰之勤者則升之上舍惰者則降之下舍
待其改過則復升之假日則聽令學射自非假日無
故不令出學數年以後上舍生學業有成就者乃聽
學官保舉蒙古人若何品級諸色人若何仕進其未
成就者且令依舊學習俟其可以從政然後歲聽學
官舉其賢者能者使之依例入仕其終不可教者三
年聽令出學凡學政因革生員增減若得不時奏聞
則學無弊政而天下之才亦皆觀感而興起矣然後
續立郡縣之學求以化民成俗無不可者臣等愚幼
見於書聞於師者如此未敢必其可行伏望聖慈下
臣此章令諸老先生與左丞王贊善等商議條奏施
行臣等不勝至願書奏帝覽之喜十四年授利用少
監十五年出爲燕南河北道提刑按察副使帝遣通
事脫虎脫護送西僧往作佛事還過眞定驛吏幾
死訴之按察使不敢問不忽木受其狀以僧下獄脫
虎脫直欲出僧辭氣倔強不忽木令去其冠廷下責
以不職脫虎脫歸以聞帝曰不忽木素剛正必爾
輩犯法故也繼而燕南奏至帝曰我固知之十九年
陞提刑按察使有訟靜州守臣盜官物者靜州本隸
河東特命不忽木往按之歸報稱旨賜白金千兩鈔
五千貫二十一年召參議中書省事時權茶轉運使
盧世榮阿附宣政使桑哥言能用已則國賦可十倍
於舊帝以問不忽木對曰自昔聚斂之臣如桑弘羊

宇文融之徒操利術以惑時君始者莫不謂之忠及
其罪稔惡著國與民俱困雖悔何及臣願陛下無納
其說帝不聽以世榮爲右丞不忽木遂辭參議不拜
二十二年世榮以罪被誅帝曰朕愧卿擢吏部尚
書時方籍沒阿合馬家其奴張散札兒等罪當死謬
言阿合馬家賞隱寄者多如盡得之可資國用遂勾
考捕繫連及無辜京師騷動帝頗疑之命丞相安童
集六部長貳官詢問其事不忽木曰是奴爲阿合馬
心腹爪牙死有餘罪爲此言者蓋欲苟延歲月微幸
不死爾豈可復受其誑嫁禍善良耶急誅此徒則怨
謗自息丞相以其言人奏帝悟命不忽木鞠之具得
其實散札兒等伏誅其捕繫者盡釋之二十三年改
工部尚書九月遷刑部河南按察使阿合馬以貲財
諂媚權貴貸錢於官約償羊馬至則抑取部民所產
以輸事覺遣使按治皆不伏及不忽木往始得其不
法百餘事會大同民饑不忽木以便宜發倉廩賑之
阿合馬所善善臣奏不忽木擅發軍儲又鍛鍊阿合
馬使自誣服帝曰使行發粟以活吾民乃其職也何
罪之有命移其獄至京師審視阿合馬竟伏誅吐土
哈求欽察之爲人奴者增益其軍而多取編民中書
僉省王遇驗其籍改正之吐土哈遂奏遇有不臣語
帝怒欲斬之不忽木諫曰遇始令以欽察之人奴爲
兵未聞以編民也萬一他衛皆倣此戶口耗矣若誅
遇後人豈肯爲陛下盡職乎帝意解遇得不死二十
四年桑哥奏立尚書省誣殺參政楊居寬郭祐不忽
木爭之不得桑哥深忌之嘗指不忽木謂其妻曰他
日籍我家者此人也因其退食責以不坐曹理務欲

加之罪遂以疾免車駕還自上都其弟野禮審班侍
坐輦中帝曰汝兄必以某日來迎不忽木果以是日
至帝見其羸甚問其祿幾何左右對以滿病假者例
不給帝念其貧命盡給之二十七年拜翰林學士承
旨知制誥兼修國史二十八年春帝獵柳林微里等
劾奏桑哥罪狀帝召問不忽木具以實對帝大驚乃
決意誅之罷尚書省復以六部歸於中書欲用不忽
木爲丞相固辭帝曰朕過聽桑哥致天下不安今雖
悔之已無及矣朕識卿幼時使卿從學政欲備今日
之用勿多讓也不忽木曰朝廷勤舊舊爵居右者
尚多今不次用臣無以服衆帝曰然則孰可對曰太
子詹事完澤可擢者籍沒阿合馬家其路遠近臣皆
有簿籍唯無完澤名又嘗言桑哥爲相必敗國事今
果如其言是以知其可也帝曰然非卿無以任吾事
乃拜完澤右丞相不忽木平章政事上都留守木八
剌沙言改按察使置廉訪司不便宜罷去乃求憲臣
賊罪以動上聽帝以責中丞崔或或謝病不知不忽
木面斥或不直言因歷陳不可罷之說帝意乃釋王
師征交趾失利復謀大舉不忽木曰島夷詭詐天威
臨之寧不震懼獸窮則噬勢使之然今其子日燾襲
位若遣一介之使諭以禍福彼能悔過自新則不煩
兵而下矣如或不悛加兵未晚帝從之於是交趾感
懼遣其僞昭明王等詣闕謝罪盡獻前六歲所當貢
物帝嘉曰卿一言之力也即以半賜之不忽木辭
曰此陛下神武不殺所致臣何功焉惟受沉水假山
象牙鎮紙水晶筆格而已麥木丁請復立尚書省專
領右三部不忽木庭責之曰阿合馬桑哥相繼誤國